

嘉靖平倭祇役紀畧

第三冊 疏

嘉靖平倭祇役紀畧卷三

慈谿趙文華原寶甫著

條陳海防疏

題爲區處海防因地制禦事臣惟禦賊之道一
曰守二曰攻三曰撫三者並行然後可以制勝
不窮而久安長治今直隸浙江福建三省均爲
沿海倭寇出沒之地而其所以制禦之法則隨
勢異宜蓋遭賊據害莫如松江松江不守則江

南浙西永無寧期而財賦之額日虧削矣故治
松江之法貴嚴以爲守所謂嚴者謂既有海防
而又嚴兵于內也臣按圖躬視東南巨浸皆自
吳松江入海迤浙有山大江有沙二水交匯皆
以松江之海爲堂輿故松之浦東及嘉定江東
四百里皆海壖坦途通賊徑道最難防守 國
初據要設金山衛備倭官與揚州官軍輪番出
哨金山羊山勝山謂之搜山謹嚴堂輿其後軍

伍旣耗哨船遂革倭寇得擇便利穴浦東海濱
膏腴之地極目蕪萊而沿海衛所皆空城羸卒
矣據金山衛申擬在城設縣割華亭近保居民
協守而松江府擬築柘林添所守禦夫立縣設
所二者皆因民爲守也今民逃賊擾人無固心
雖添設縣所將何守之今若及時召集鄉民且
耕且守令熟知土俗閒致鄉官素望服人實心
報國者俾領其事以勸勦撫按諸臣之不逮

其法照 國初屯制而加優之盡浦以東每三十畝除正糧外免其雜辦出兵一名約可得兵萬餘如原主復業亦令照田出兵不另召佃如此則人心安而邦本固蓋因兵于農而兵自足所以爲守也浙之寧紹台溫爲蘇州門戶治浙之法貴遠以爲攻 國初禁船私出外洋其跨海百里有山之內皆爲裏洋立所設司船哨水寨並有居民如舟山者 舊制尙存永樂間倭

夷作釁議者不修海防而咎居民媒寇徙入內地故水寨亦徙而倭患遂肆貢市羈縻久乃大壞據温州府知府龔秉德議修拓海防原設所司船寨一繩初制列屯截守其原棄田地量遠近給兵或五十畝或百畝悉令屯種如福寧于山温州南紀東落中界大小門山台州玉環山丕山寧波九山周圍塗地實不下百十萬畝開闢漸廣養兵奚啻萬人而哨舶依賴將來沿海

小民咸利爲兵以倉廩視海防夷寇爲家盜不
煩有司運饋而關守自嚴兵食俱足蓋因食于
地而食自克所以爲攻也若治福之法貴專以
爲撫所謂專者專官理之也福地素通番船其
賊多諳水道操舟善鬪皆漳泉福寧人漳之詔
安有梅嶺龍溪海滄月港泉之晉江有安梅福
寧有桐山各海澳僻遠賊之窩嚮船主喇哈火
頭舵公皆出焉近作孽黃巖勾引倭賊但調福

蒼船捕內多賊黨又其界潮州南澳番船貨萃
今年四五月內傳聞海賊王直等販貨到彼輸
稅貿易其養子毛賊徒黨徐賊據險尙在又直
浙戰船猶資閩廣財利所在規射難禁提督軍
門駐浙隔數千里首尾不應猝難盡誅今若專
官彼地嚴爲譏察所調用海船實貨編號以次
挨放勘裝充餉惟無號者禁捕之賊必消其勾
逆轉爲我用行是三者財無濫賦兵不遠疲無

絡繹騷擾之難而得經理周密之善是在用人而已用人之道在明其職分用其所長則利可興而政易舉今總督提督事權相軋易于掣肘浙江福建道理遼遠事難遙制江南巡撫總理糧儲加以軍門提督一人數事顧彼失此臣愚以爲使直隸提督管直隸軍門之事浙江提督管浙江軍門之事而福建則暫設經畧總督則兼管錢糧不逼不疏事乃可理臣又查得永樂

間倭寇登劫 朝廷以失機坐指揮千戶戮三十餘人子孫不許世襲海道遂平今若申明

成法各自爲守沿海責之各城掌印守備海上責之把總遊擊內地責之守令守巡若有倭賊登岸地方失事各罪坐所由置之重典則人知畏法而自爲奮矣臣本庸愚伏荷 皇上軫念民艱用臣督察訪求區處長策臣不敢瑣瑣煩瀆前所條議海防五事俱荷 皇上俯賜允行

今復披瀝芻蕘乞 勅該部詳議可否以息永
患臣不勝仰望欣願之至奉 旨兵部看了來
說

搗巢捷疏

題爲官兵搗巢捷音事先該臣等督同將士會
勦陶宅賊巢雖互有殺傷而賊勢由此畏縮逃
住周浦寺內十一月初十日據松江府報稱有
雙桅賊船三十九隻到川沙窪其周浦舊賊相

爲聲勢出沒不常二夥約有二三千本月十九日該四川僉事焦希程遊擊將軍曹克新共領四川漢土官兵四千餘來到蘇二十二日臣自蘇州督令前兵從泖湖逕進會同總督侍郎楊宜督同監軍僉事焦希程遊擊曹克新誓師黃浦于閏月初二日雪夜發兵向周浦寺進勦斬獲賊級八十八顆從賊四十六顆餘賊百餘人從間道奔至川沙窪與新賊合夥初六日川兵

追至川沙窪賊急登舟盡數開洋因風阻回至吳淞江口初八日副總兵俞大猷兵備副使王崇古督同把總劉鏜及楊尙英鄧城等各水兵外洋邀擊斬獲賊級一百七十餘顆溺水者不計殘賊登岸逃奔上海東溝地方仍發川兵至東溝追勦俟勦盡再報外臣查得倭賊內犯多福漳人勾引有原任福建備倭戴冲霄口稱俱係士夫家爲之窩主戶相倣效浙直禍源未塞

皆由此等若不急爲處治沿海地方無日寧息
今調到川湖山東廣東客兵已盈一萬而未到
者尙約萬餘其閩廣海船調募者不預焉地方
供應繁難各州縣所養鄉兵多糜費無實不知
何以善後伏乞 天語丁寧當事諸臣無怙倖

成之功永圖萬全之績俟賊平後將來防禦務
令事事有備思患預防如疾之慎理小愈則攻
守並得而海徼永寧矣奉 旨地方稍寧着趙

文華還京其餘禦來事宜各該督撫官用心幹
理不許怠翫誤事兵部知道

川兵潰疏

題爲 軍情事臣于本月初二等日各兵搗巢
殺賊之後臣不勝忻躍切惟 聖心南顧急欲
報捷于十三日卽具疏差人齎奏據各領兵官
報零賊四散逃匿絕食計無不擒獮而撲滅者
至十八日忽報四川西陽兵因戰失水寒凍乘

機相哄駕船逃回據監軍僉事焦希程報于本月十二日職等督兵在于東溝一戰斬獲首級三十八顆天晚收兵十四日各兵分哨松盛疊溪永平壩底成都五衛爲中哨高琪筠連天全大渡河爲左哨西陽邑梅平茶爲右哨各奮勇前進左哨兵挑戰賊有九十餘人過河各兵當卽撤去橋板將各賊盡行勦殺未及斬首間賊後分三路迎敵因西陽兵站立不住先行奔走

以致眾兵潰散賊追至江邊各兵上船不及淪
死數多據此照得遊擊曹克新統領遠人當先
陷陣攻破周浦賊壘轉戰十餘日而饋餉不繼
孤軍深入無一後援枵腹而鬪遇伏致潰雖寡
謀輕敵而膽氣甚壯與逗留觀望者霄壤不同
似應畧其失律著爲令甲以勸忠勇況其先後
斬級例登報捷功有可錄伏乞 勅下該部酌
量議覆施行臣又探得東溝賊數尙約有一千